

Sinar Harian, Sabtu, 8 Jun 2024

Jadikan TVET pilihan utama

Seiring keperluan negara dalam menyediakan lebih banyak tenaga kerja mahir

BANTING

Malaysia perlu bergerak ke arah menjadikan bidang Pendidikan Teknikal dan Latihan Vokasional (TVET) sebagai pilihan utama lepasan sekolah menengah, kata Timbalan Perdana Menteri, Datuk Seri Dr Ahmad Zahid Hamidi.

Beliau yang juga Pengerusi Jawatankuasa TVET Negara berkata, saranan itu seiring keperluan negara dalam menyediakan lebih banyak tenaga kerja mahir atau berketerampilan bagi memenuhi keperluan sektor pekerjaan pada masa akan datang.

"Kita perlu bergerak ke hadapan dengan mengikuti

negara maju lain seperti Jepun, dengan TVET menjadi pilihan utama lepasan sekolah menengah berumur 15 tahun dan ke atas.

"Di Malaysia, Kementerian Pendidikan juga telah memulakan Pendidikan TVET melalui Kolej Vokasional kepada lepasan Tingkatan Tiga dan usaha ini perlu diperkasakan lagi agar TVET menjadi pilihan utama di negara ini," katanya.

Beliau berkata demikian selepas meninjau tapak pameran bersempena dengan sambutan Hari TVET Negara 2024 di Institut Latihan Perindustrian (ILP) Kuala Langat di sini pada Jumaat.

Ahmad Zahid berkata, ketika ini terdapat lebih 4,000 kursus yang ditawarkan melalui 1,345 institusi TVET di seluruh negara dengan tawaran ke-masukan sebanyak 250,000 tempat.

Daripada jumlah itu, pihaknya menerima 280,000 permohonan daripada pelajar lepasan Sijil Pelajaran Malaysia (SPM) dan berharap sekurang-kurangnya 40 peratus daripada permohonan itu dapat memula-



Ahmad Zahid (tengah) pada sesi lawatan sekitar tapak Program Hari TVET Negara 2024 di ILP Kuala Langat di Banting pada Jumaat.

kan pengajian pada sesi ke-masukan Julai ini.

"Kita harap ibu bapa boleh memainkan peranan dengan menggalakkan anak-anak mereka mengikuti pendidikan TVET yang diketahui dapat menjanjikan lebih peluang pekerjaan dengan gaji lebih tinggi," katanya.

Dalam pada itu, Timbalan Perdana Menteri berkata, pelajar yang tidak hadir menduduki peperiksaan SPM 2023

juga layak mengikuti pengajian di institusi TVET dengan syarat minimum mereka perlu menguasai teknik 3M iaitu membaca, menulis dan mengira.

"Ia antara usaha kerajaan dalam memastikan masa depan mereka lebih terjamin melalui kemahiran yang diperolehi menerusi pendidikan TVET.

"Malah, kita juga menggalakkan pelajar yang memperoleh keputusan cemerlang dalam SPM untuk menyambung

pengajian ke peringkat lebih tinggi dalam bidang TVET di lima universiti TVET, antaranya UniKL, Universiti Malaysia Pahang dan Universiti Malaysia Perlis," katanya.

Berhubung sambutan Hari TVET Negara 2024, Ahmad Zahid berpuas hati dengan perjalanan program dan aktiviti yang dilaksanakan. Setakat Jumaat, lebih 10,000 orang mengunjungi sambutan tersebut. - Bernama